


Ni Presidente Thomas S. Monson



# Maaddaan iti Panawen para iti Mangisalakan

**P**askua manen ken asidegen ti rugi ti baro a tawen. Kasla idi kalman laeng a rinambakantayo ti pannakayanak ti Mangisalakan ken nagituding kadagiti panggep a tun-oyen iti baro a tawen.

Maibilang kadagiti panggeptayo a tun-oyen iti baro a tawen, inkeddengtayo kadi iti biagtayo a maaddaan iti umdas a panawen para iti Mangisalakan ken maaddaantayo iti lugar kadagiti pusotayo para Kenkuana? Kasano man ti kinaballigitayo iti kasta a panggep a tun-oyen, mamatiak a tartarigagayantayo amin nga ipatungpal daytoy a nasaysayaat. Daytoy a panawen ti Paskua ti kapintasan a panawen tapno amirisen ken mangpabaro kadagiti panagkagumaantayo.

Iti makumikom a biagtayo, addaantay kadagiti nakaadadu a dadduma pay a banag a nasken pay nga asikasuentayo, kasapulan nga agaramidtayo iti nairanta, naikumit a panagkagumaan a mangyeg ken ni Cristo iti biagtayo ken iti pagtaengantayo. Ken napateg unay a datayo, kas kadagiti Masirib a Lallaki manipud iti Daya, ket agtalinaed koma a nakapokus iti bituenna ken “umay tapno agdaydayaw Kenkuana.”<sup>1</sup>

Agingga kadagiti kaputotan ti panawen, isu latta ti mensahe manipud ken Jesus. Kada Pedro ken Andres iti igid ti Galilea, Kinunana “Surotendak.”<sup>2</sup> Ken ni Felipe dimteng ti awag, “Surotennak.”<sup>3</sup> Iti Levita a nabilin, “Surotennak.”<sup>4</sup> Ken kadakayo ken siak, no laeng dumngegtayo, umay met ti isu met la a pumaypayapay nga awis: “Surotendak.”<sup>5</sup>

Iti panangsurottayo kadagiti tugotna ita ken tuladentayo ti pagwadanna, maaddaantayo kadagiti gundaway a mangparabur iti biag dagiti dadduma. Aw-awisennatayo ni Jesus a mangted iti bagitayo: “Adtoy, kasapulan ti Apo ti puso ken natallugod a panunot.”<sup>6</sup>

Adda kadi maysa a tao a nasken a pagserbianyo itoy a Paskua? Adda kadi maysa nga agur-uray iti isasarungkaryo?

Adun a tawen ti naglabas sinarungkarak ti pagtaengan ti maysa a baket a balo iti panawen ti Paskua. Bayat ti kaaddak sadiay, nagkiriring ti doorbell. Iti sango ti ridaw nakatakder ti maysa a makumikom ken nalatak a mangngagas. Saan a naawagan; ngem ketdi, narknana laeng ti sumarungkar iti maysa a pasiente a malmalday.

Kadagitoy a panawen, dagiti puso dagiti saan a makaruar iti pagtaenganda ket umasidegda ken umararawda iti pannakabisita ita a panawen ti Paskua, Maysa a Paskua bayat ti ibibisitak iti maysa a sentro ti pagaywanan, nakasaritak ti lima a babbaket, 101 ti tawen ti kabaketan. Bulsek isuna, ngem mailasinna ti timekko.

“Bishop, nagabayka bassit nga immay itoy a tawen!” kinunana. “Impagarupko a saanka nga umayen.”

Naragsak ti saritaanmi a dua. Nupay kasta, maysa a magagaran unay a pasiente ti timmamdag iti tawa ket madagdagullit nga insaona, “Ammok umaynako bisaen ti anakko a lalaki ita nga aldaw.” Diak la ammo no umay isuna, gapu ta adda dagiti panawen ti Paskua a saan a pulos bimmisita.

Adda pay la panawen itoy a tawen tapno mangipaay iti tulong, pammateg, ken pagimbagan—iti sabali a pannao, surotentayo ti pagwadan nga impakita ti Mangisalakantayo ken agserbitayo kas iti kayatna a panagserbitayo. No agserbitayo Kenkuana, ditayo maisuko ti gundawaytayo, kas iti inaramid ti agay-aywan iti pagdagusan,<sup>7</sup> tapno maaddaan iti panawen para Kenkuana iti biagtayo ken adda lugar para Kenkuana iti puspusotayo.

Maawatantayo kadi ti naindaklan a kari a linaon ti mensahe ti anghel a naited kadagiti pastor nga adda iti talon: “Yegko kadakayo dagiti naimbag a damag ti naindaklan a rag-o. . . . Kadakayo maipasngay itoy nga aldaw . . . ti maysa a Mangisalakan, nga isu ni Cristo nga Apo?”<sup>8</sup>

Iti panagsisinnukattayo iti regalo iti Paskua, malagiptayo koma, makapagyaman, ken maawattatayo dayta kaindaklan ti amin a sagut—ti sagut ti Mangisalakan ken Mannubottayo, tapno maaddaantayo iti agnanayon a biag.

“Ta ania koma ti magunggon ti tao no maikkan ti sagut ngem saanna nga awaten ti sagut? Adtoy, saan nga agrag-o iti dayta naited kenkuana wenno agrag-o iti nangted kenkuana iti sagut.”<sup>9</sup>

Makasurottayo koma Kenkuana, makapagdayaw Kenkuana, ken makaawattatayo kadagiti sagutna kadatayo iti biagtayo, tapno mabalintayo, kadagiti balikas ni Ama Lehi, “a malikmutan iti agnanayon kadagiti takiag ti ayatna.”<sup>10</sup>

#### DAGITI NAGADAWAN

1. Mateo 2:2.
2. Mateo 4:19.
3. Juan 1:43.
4. Mateo 9:9.
5. Doktrina ken Katulagan 38:22.
6. Doktrina ken Katulagan 64:34.
7. Kitaen iti Lucas 2:7.
8. Lucas 2:10–11.
9. Doktrina ken Katulagan 88:33.
10. 2 Nephi 1:15.

#### PANANGISURO MANIPUD ITI DAYTOY A MENSAHE

Aw-awagannatayo ni Presidente Monson nga “agaramid iti naigagara, naikumit a panagkagumaan a mangyeg ken ni Cristo iti biagtayo ken iti pagtaengantayo.” Paglilinnawaganyo kadagiti sursuruanyo no kasano a maaramidda daytoy naigagara a panagkagumaan kas maysa a tao ken kas maysa a familia. Mabalinyo nga idawat kadakuada a mangpanunot iti maysa a tao wenno familia a bisitaenda wenno pagserbianda

itoy a Paskua. “Adda pay la panawen itoy a tawen a mangipaay iti tulong, pammateg, ken pagimbagan.”

## AGTUTUBO

### Dagiti Wagas a Pakapagserbian iti Panawen ti Paskua

**A**dda panawen ni Presidente Monson a mangsarungkar kadagiti babbaket ken lallakay ken dagiti adda kadagiti sentro a pagaywanan, nangnangruna iti panawen ti Paskua. Nadlawna nga adda dagiti naragsakan gapu ta nabisitada, idinto ta mangnamnama laeng dagiti dadduma pay a mabisitada ngem saan uray kaano man. Adda dagiti tao nga agur-uray iti maysa a tao—nalabit nga itoy a Paskua, mabalina a *sika* dayta maysa a tao a bumisita.

Ti sumaganad ket listaan ti sumagmamano laeng a wagas a pakatulunganyo a mangpennek nga awan ti makarikna nga agmaymaysa itoy a Paskua. Nawaya-kayo a mangpanunot iti ad-adu pay a wagas a pakatulunganyo iti komunidadyo itoy a panawen ti Paskua. “Adda kadi maysa nga agur-uray iti isasarungkaryo?”

- Agaramidkayo kadagiti Christmas Cards nga ipatulod kadagiti misionario ken dagiti awan pay asawana ken babbaket ken lallakay a miembro ti ward wenno branchyo.
- Agboluntario iti maysa nga organisasion ti komunidad iti lugaryo.
- Mangtedkayo kadagiti kopia ti Libro ni Mormon kas sagut iti Paskua kadagiti gagayem ken kaarrubayo.
- Sarungkaranyo dagiti lallakay ken babbaket iti ward wenno pamilyayo.
- Agaramid kadagiti makan nga ited kadagiti kaarrubayo.

## ANNAK

### Surotenyo ti Lawag

**K**alpasan a nayanak ni Jesus, nangyeg Kenkuana iti sagut dagiti Masirib a Lallaki. Sinurotda ti maysa a baro, naraniag a bituen iti tangatang a nangsapul Kenkuana. Ania a sagsagut ti mabalinyo nga ited ken ni Jesus itoy a Paskua?



# Dagiti Kababalin ni Jesucristo: Manangngaasi ken Naimbag

*Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo kadagiti nadiosan a kababalin ti Mangisalakan ket mangpapgisa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion mapan iti [reliefsociety.lds.org](http://reliefsociety.lds.org).*

Pammati, Pamilia, Tulong

*Daytoy ti paset ti maysa a serye dagiti Mensahe iti Visiting Teaching a mangitampok kadagiti kababalin ti Mangisalakan.*

“Kadagiti nasantuan a kasuratan, ti panangngaasi ket kayatna a sawen ti ‘makipagsagaba.’ Kayatna pay a sawen ti panangipakita iti pannakipagrikna ken asi iti tunggal maysa.”<sup>1</sup>

“Impaayannatayo ni Jesus iti adu a pagwadan ti manangngaasi a pananakaseknan,” kinuna ni Presidente Thomas S. Monson. “Ti lugpi a lalaki iti pagdigusan ti Betesda; ti babai a nagbasol iti pannakikamalala; ti babai iti abay ti bubon ni Jacob; ti babai nga anak ni Jairo; Lazaro, lalaki a kabsat da Maria ken Marta—mangibagi ti tunggal maysa a kas iti maysa a nadangran iti kalsada ti Jerico. Agkasapulan iti tulong ti tunggal maysa.

“Iti lugpi iti Betesda, kinuna ni Jesus, ‘Bumangonka, bagkatem ti pagiddaam, ket magnaka.’ Iti managbasol a babai naited ti balakad, ‘Inkan, ket saankan nga agbasolen.’ Tapno matulonganna ti babai a makaala iti danum, Isu ket nangted kenkuana iti ubbog ti danum nga ‘agburayok a maipaay iti biag nga agnanayon.’ Iti natay a babai nga anak ni Jairo immay ti bilin, ‘Bala-sang, kunak kenka, tumakderka.’ Iti naitanem a Lazaro, ‘Rummuarka.’

“Kanayon a nangipakita ti Mangisalakan iti saan a limitado a kapasidad para iti panangngaasi. . . . Luktantayo koma ti ruangan dagiti puspustotayo, tapno Isu—ti sibibiag a pagwadan ti pudno a panangngaasi—ket makastrek.”<sup>2</sup>

## **Dagiti Mainayon a Nasantuan a Kasuratan**

Salmo 145:8; Zacarias 7:9; 1 Pedro 3:8; Mosiah 15:1, 9; 3 Nephi 17:5–7

## **Manipud kadagiti Nasantuan a Kasuratan**

“Nagparintumengkami nga agasawa iti abay ti anakmi a babai nga agtawen iti sangapulo-ket-pito ket nagpakaasi nga ispalenna koma ti biagna,” kinuna ni Linda S. Reeves, maikadua a mammagbaga iti sapa-sap a panguluen ti Relief Society. “Ti sungbat ket saan, ngem . . . naam-muanmi . . . a . . . [ti Mangisalakan] mariknana ti panangngaasi para kadatayo iti panagladingittayo.”<sup>3</sup>

“Maysa kadagiti paggugustok nga estoria manipud iti biag ti Mangisalakan ket ti estoria maipapan ken ni Lazaro. Ibagi dagiti nasantuan a kasuratan kadatayo nga ‘inayat ni Jesus ni Marta, . . . ti kabsatna a ni [Maria], ken ti [kabsatda] a ni Lazaro.’”<sup>4</sup> Idi nagsakit ni Lazaro, naipadamag ken

ni Jesus, ngem idi dumteng ni Jesus natayen ni Lazaro. Timmaray ni Maria a napan ken ni Jesus, nagruknoy kadagiti saksakana, ket nagsangit. Idi makita ni Jesus nga agsangangit ni Maria, “nagladingit ti nakemna, ket . . . nagsangit” (Juan 11:33, 35).

“Dayta ti pagrebbengantayo. Nasken a marikna ken makitatayo para iti bagbagitayo ket kalpasanna tulongantayo ti amin nga annak ti Nailangitan nga Ama a makarikna ken makakita ken makaammo a ti Mangisalakan ket inawatnan iti Bagina saan laeng ti amin a basbasoltayo no di ketdi pay ti amin a saem ken panagsagaba ken panagtutuoktayo tapno iti kasta maammuanna no ania ti marikriknatayo ken no kasano a maliwliwanatayo.”<sup>5</sup>

## **DAGITI NAGADAWAN**

1. Pangiwanwan iti Nasantuan a Kasuratan, “Panangngaasi.”
2. Thomas S. Monson, “The Gift of Compassion,” *Liahona*, Mar. 2007, 4–5, 8.
3. Linda S. Reeves, “The Lord Has Not Forgotten You,” *Liahona*, Nob. 2012, 120.
4. Linda S. Reeves, “The Lord Has Not Forgotten You,” 118.
5. Linda S. Reeves, “The Lord Has Not Forgotten You,” 120.

## **Ibilang Daytoy**

Asino ti maparaburan babaen ti panangngaasiyo?